

## Đoković spasio dvije meč-lopte i trijumfom nad Federerom osvojio peti Wimbledon



U jednom od najvećih i najdužem finalu Wimbledona ikada, viđena je gladijatorska bitka između Novaka Đokovića i Rogera Federera. Srbijski teniser je na kraju došao do pete titule na najvećem i najprestižnijem teniskom takmičenju pobijedivši Švicarca sa 3:2 (7:6, 1:6, 7:6, 4:6, 13:12).

Đoković je u prvom setu lako branio svoje servise, ali nije uspevao da napadne Federerove. Jedinu brejk loptu imao je švicarski teniser u četvrtom gemu, ali spasio ju je Đoković. Prvi set otišao je u taj brejk u kojem je srbijski teniser bio bolji sa 7:5.

Očajno je počeo drugi set za Đokovića. Federer je na startu drugog seta napravio dva vezana brejka. Srbijski teniser nije uspevao zaprijetiti i već se vidjelo na početku da nema šta tražiti. Švicarac je u sedmom gemu brejkom došao do 6:1.

Đoković se i dalje mučio i kaskao za Federerom, ali je pokazao još jednom nevjerovatnu psihičku snagu. Ponovo nije uspevao napasti servis Švicarca, koji je imao set loptu u desetom gemu, ali ju je spasio prvi reket svijeta i otišlo se u novi taj brejk u kojem je Nole ponovo bio bolji, ovaj put sa 7:4.

U četvrtom setu kada se činilo da se meč okreće na Đokovićevu stranu, zbog nešto lošijih servisa Srbijanca došao je Federer do dvije vezane brejk lopte u petom gemu i odmah prvu iskoristio. Švicarac je i u sedmom gemu oduzeo servis Đokoviću. Nole je vratio jedan brejk, ali to je bilo sve i legendarni Švicarac dobio je četvrti set sa 6:4 i izjednačio na 2:2 u setovima.

Prvi reket svijeta imao je tri brejk lopte u četvrtom gemu petog seta, no nije ih iskoristio. Ipak, jeste drugu u šestom gemu kada je poveo sa 4:2. Međutim, nije uspio potvrditi brejk. Federer mu je oduzeo servis u narednom gemu za 4:3.

Nastavila se nakon toga velika borba dvojice velikana, vidjeli smo na kraju pravu dramu, a naredni brejk pravi Roger pri rezultatu 7:7. Poveo je tada Švicarac i sa 8:7, ali nije uspio da potvrdi ovaj brejk iako je imao i dvije meč lopte, koje je Đoković spasio i poravnao na 8:8.

Na sljedeću brejk šansu smo čekali do 23. gema, a imao ju je tada Federer, ali nije je iskoristio nakon

Novakovog odličnog servisa. Srbinac je dobio gem i poveo sa 12:11.

Federer je nakon toga lagano poravnao na 12:12, te je meč morao biti odlučan nakon taj-brejka.

Do mini-brejka prvi stiže Đoković i vodi sa 2:1, a onda je to potvrdio i svojim dobrim servisom.

Na kraju je Đoković slavio i u trećem taj-brejku današnjeg meča, a ovaj put je rezultat bio 7:3 za veliko slavlje prvog tenisera svijeta.

Ovo je bilo i najduže finale u historiji Wimbledona, a trajalo je 5 sati i 2 minute.

Ovo je bio 48. put, a čak treći u finalu Wimbledona da se sastaju Đoković i Federer. Do sada im je međusobni omjer bio 25:22 u korist srbijanskog tenisera. Ovo je bila njegova deveta pobjeda na posljednjih deset duela sa Švicarcem.

Za Đokovića ovo je bila peta titula na Wimbledonu i 16 Grand Slam titula, čime se približava Federeru koji ima 20.

(SCsport)

Date: 14-07-2019